

# **AWIG – AWIG**

## **DESA ADAT KWANJI**



**KELURAHAN SEMPIDI  
KECAMATAN MENGWI  
KABUPATEN DAERAH TK. II BADUNG  
TAHUN 1991**

## DAGING AWIG-AWIG

|                                           |    |
|-------------------------------------------|----|
| CARA CITTA .....                          | 1  |
| SARGA I ARAN LAN WEWIDANGAN DESA .....    | 1  |
| Palet 1 ARAN DESA .....                   | 1  |
| Palet 2 WEWIDANGAN .....                  | 2  |
| SARGA II PETITIS LAN PAMIKUKUH .....      | 2  |
| Palet 1 PAMIKUKUH .....                   | 2  |
| Palet 2 PETITIS .....                     | 3  |
| SARGA III SUKERTA TATA PEKRAMAN .....     | 3  |
| Palet 1 PEKRAMAN .....                    | 3  |
| Palet 2 PRAJURU .....                     | 6  |
| Palet 3 KULKUL .....                      | 7  |
| Palet 4 PARUMAN .....                     | 9  |
| Palet 5 DRUWEN DESA .....                 | 10 |
| Palet 6 SUKERTA PAMITEGEP .....           | 11 |
| Kaping 1 PEKARANGAN .....                 | 11 |
| Kaping 2 TETANDURAN LAN PEPAYONAN .....   | 13 |
| Kaping 3 WEWANGUNAN .....                 | 15 |
| Kaping 4 WEWALUNGAN .....                 | 15 |
| Kaping 5 BHAYA .....                      | 17 |
| Kaping 6 PENYANGGRA .....                 | 18 |
| SARGA IV SUKERTA TATA AGAMA .....         | 18 |
| Palet 1 DEWA YADNYA .....                 | 18 |
| Palet 2 RESI YADNYA .....                 | 21 |
| Palet 3 PITRA YADNYA .....                | 22 |
| Palet 4 MANUSA YADNYA .....               | 24 |
| Palet 5 BHUTA YADNYA .....                | 25 |
| SARGA V SUKERTA TATA PAWONGAN .....       | 25 |
| Palet 1 PAWIWAHAN .....                   | 25 |
| Palet 2 PEGAT MERABIAN .....              | 26 |
| Palet 3 INDIK SENTANA .....               | 27 |
| Palet 4 INDIK WARIS .....                 | 28 |
| SARGA VI WICARA LAN PAMIDANDA .....       | 29 |
| Palet 1 WICARA .....                      | 29 |
| Palet 2 PAMIDANDA .....                   | 30 |
| SARGA VII NGUWAH NGUWUHIN AWIG-AWIG ..... | 31 |
| SARGA VIII PEMUPUT .....                  | 32 |

## C A R A C I T T A

OM, AWIGHENAMASTU NAMA SIDDHAM

OM, SARASWATI BHAKTYA NAMAH

Melarapin saking panghyangning kalih paswecan Ida Sanghyang Widhi Wasa asung wara nugraha ngawentenang kahuripan sekala niskala ring Bhuwana Agung lan Bhuwana Alit, jangkep saha Tri Hita Karananya, ngastuti kerahajengan tata susila, tata krama sane kabuat ring Desa Adat anggen mikukuhin Agama Hindu druwene, nganutin Desa, Kala, Patra, Tri Semaya ngaran Atita, Nagata, Wartamana miwah Tri Pramana ngaran Praktiyaksa, Anumana, Agama kedulurin antuk keraketan sejeroning Krama Desa Adat miwah ring Krama Desa Adat tiosan minakadi tulung sinulung, selunglung sebayantaka, gumanti memangguhin kerahajengan miwah kerta raharja ring Desa Adat.

Sejabaning dresta inucap, minakadi Pancasila, Undang-Undang Dasar 1945, miwah sehanan Peraturan Negara Republik Indonesia, tan maren keinggilang, tan wenang miwah tan patut kelempasin antuk Awig-Awig Desa Adat puniki.

Titanen sinamiyan saking Krama Desa Adat Kwanji mapidabdab ngardi Awig-Awig sane kemanggehang ring wewengkon Desa Adat Kwanji sekadi ring sor.

## S A R G A I

## A R A N L A N W E W I D A N G A N D E S A

Palet 1

A R A N D E S A

Pawos 1

Desa Adat puniki mawasta Desa Adat Kwanji.

Palet 2  
W E W I D A N G A N

Pawos 2

Wewidangan Desa Adat Kwanji mewates nyatur Desa, sisi kangin Desa Adat Sempidi, sisi kelod Desa Adat Padangsambian, sisi kawuh Desa Adat Padang Luwih lan Dalung, sisi kaler Desa Adat Sempidi lan Lukluk.

Pawos 3

Wewidangan Desa Adat Kwanji ngewengku Banjar Suka Duka luwir ipun :

1. Banjar Suka Duka Kwanji Kaja;
2. Banjar Suka Duka Kwanji Kelod;
3. Banjar Suka Duka Umegunung.

Pawos 4

Asing-asing Banjar patut wenten bates ipun, mederbe Bale Banjar, Bale Kulkul lan Parhyangan.

S A R G A I I  
P E T I T I S L A N P A M I K U K U H

Palet 1  
P A M I K U K U H

Pawos 5

Desa Adat Kwanji ngemanggehang pamikukuh :

1. Pancasila, manut keanggehang ring Mukadimah Undang-Undang Dasar 1945;
2. Undang-Undang Dasar 1945;
3. Agama Hindu pemekas Tri Hita Karana;
4. Pasilih asih Selunglung Sabhayantaka;
5. Perda No. 6 Tahun 1986.

Palet 2  
P E T I T I S

Pawos 6

Petitis Desa Adat Kwanji :

1. mikukuhin miwah ngerajegang Sanghyang Agama;
2. nginggilang tata prawertine megama;
3. nincapang kaweruhan Krama Desa Adat kalih ngewerdianing Bhoga, Upabhoga, Paribhoga;
4. ngewangun pasukertan ring Pekraman, kandugi mangguhang kejagatdhitan melarapan antuk pasilih asih selunglung sebhayantaka.

S A R G A   I I I  
S U K E R T A   T A T A   P E K R A M A N

Palet 1  
P E K R A M A N

Pawos 7

Sane sinanggeh Krama Desa Adat Kwanji inggih punika sapa sira ugi sane nganut Agama Hindu, jumenek lan medrebe karang paumahan ring sewewengkon Desa Adat Kwanji.

Pawos 8

Sapa sira ugi sane nganut Agama Hindu, ngawit jenek ring sewewengkon Desa Adat Kwanji sampun medrebe karang paumahan, saha naur batu-batu pekraman manut Perarem taler kasinanggeh Krama Desa Adat Kwanji.

Pawos 9

Sapa sira ugi durung manut Pawos 7 lan Pawos 8 ring ajeng inucap, sinanggeh dunungan utawi Krama Tamiu.

## Pawos 10

Sang sane sinanggeh Krama Tamiu sampun jenek lintang ring asasih saha sampun medrebe Pengupajiwa patut keni sumbangan manut Pararem.

## Pawos 11

Sinalih tunggil krama manut Pawos 7 lan Pawos 8 inucap ring ajeng sane sampun mapikuren, patut keni ayahan lan pepeson ngawit Soma Kliwon Wuku Kuningan.

## Pawos 12

Daha Teruna sane sampun mekrama ring Sekaa Teruna-Teruni, kengin nyelediyinin ayah wong tuannyane.

## Pawos 13

Daha Teruna sane sampun meyusa 17 warsa, kengin ngemanggehang Krama Sekaa Teruna-Teruni.

## Pawos 14

Sinalih tunggil Krama Desa sane medruwe pianak utawi oka sane ngawitin mapikuren, keni pepeson lan ayahan penyelediyi.

## Pawos 15

Sinalih tunggil Krama Desa sane sampun medrebe tur ngemanggehang ayahan penyelediyi lan pepeson, krama punika tan keni ayahan lan pepeson malih.

## Pawos 16

Krama sane balu keni ayahan lan pepeson manut balunipun, sane ketepasan manut Pararem.

## Pawos 17

Balu ngemban muani ngelah pianak luh, balu luh ngelah pianak muani, sampun meyusa pitulas warsa, keni ayahan lan pepeson sewungkul sejabaning kantong mesekolah.

## Pawos 18

Sinalih tunggil Krama Desa sane ngelisting, tan meresidayang ngambil pekaryan, tan mederbe penyelediyi, krama punika tan keni ayahan lan pepeson.

## Pawos 19

Ayahan kengin kegentosang antuk artha brana, menawita sangkaning kesudi olih sang ngawa rat utawi keluasan mesengker sekirangnyane enem sasih. Agung alit pengentos punika ketepasin manut Perarem.

## Pawos 20

Mangku Kahyangan Tiga luput ayahan lan pepeson Desa miwah Banjar.

## Pawos 21

Leluputan sane manggeh ring Pawos 20 patut keterima olih penyelediyinnyane.

## Pawos 22

Sapa sira sane kesudi manut kawigunan kengin kawehin luput ayahan utawi pepeson manut Perarem.

## Pawos 23

Prade rikalaning tedun ngayah, wenten sinalih tunggil Krama metilar tan pesadok ring Prajuru sedurung panemaya puput mekarya, wenang kekeniang sisip tur kedanda manut Perarem.

## Pawos 24

Ritatkala tedun ngayah kengin mepuangkid manut wiguna sane ketepasin manut Perarem.

## Pawos 25

Wusan mekrama sangkaning :

1. pinunas ngeraga;
2. kanoroyang dwaning tan prasida ngesehin salah, meprawerti setata ngwug lan mamurug kecaping awig-awig.

## Pawos 26

Krama sane wusan mekrama ring Desa Adat Kwanji tan polih pahpahan artha brana druwen Desa muang Kahyangan Tiga, punika kewastaning guak ngutang taluh.

Palet 2  
P A R A J U R U

## Pawos 27

Prajuru Desa inggih punika sang sane ngenterang Desa Adat. Desa Adat kaenter olih Bendesa Adat, Banjar Adat kaenter olih Kelihan Banjar Adat.

## Pawos 28

Prajuru Desa ngenterang Desa Adat mewaneng limang warsa.

## Pawos 29

Pajuru kepilih miwah kegentosin medasar antuk Perarem Desa Adat. Risampun Prajuru keadegang medulurin antuk medewa saksi ring Pura Kahyangan Tiga sane kaprebiya olih Desa Adat.

## Pawos 30

Sang keanggehang Prajuru, Krama Desa sane nganut Agama Hindu, mayusa kirang langkung tigang dasa warsa, sampun merabian, weruh ring aksara, tan ceda angga tur waras.

## Pawos 31

Bendesa kesanggra antuk :

1. Pangliman pinaka Wakilnyane;
2. Penyarikan pinaka Juru Surat;
3. Petengen pinaka Juru Raksa;
4. Sejeroning kasukertan niskala, Bendesa Adat mesinggihang Pemangku Kahyangan Tiga, Pinandita lan Pandita.

## Pawos 32

Swadarmaning Bendesa Adat luire :

1. ngenterang pelaksanaan sedaging Awig-Awig lan Perarem Desa;
2. nuntun tur ngenterang krama Desa ngudpadi antuk petitis;
3. maosang kalih niwakang pemuutus ring wicara warga Desa.

## Pawos 33

Petias utawi pikolih Prajuru ketepasin manut Perarem.

## Pawos 34

Prade Bendesa Adat iwang pelaksana, patut keni sisip tur kedanda manut Perarem.

## Pawos 35

Prajuru kegentosin sangkaning :

1. sampun panemaya manut Pawos 28;
2. seda;
3. kanoroyang seantukan iwang pemargi utawi nilar sesana;
4. wit saking pinunas ngeraga.

## Palet 3

## K U L K U L

## Pawos 36

Kulkul punika sarana Desa Adat utawi Banjar Adat maka cihna ring pasikian pekayun ritatkala suka duka.

## Pawos 37

Kulkul ring Desa Adat Kwanji luire :

1. Kulkul Desa Adat;
2. Kulkul Banjar Adat ring suang-suang Banjar Adat;
3. Kulkul Pura ring suang-suang Pura;
4. Kulkul-kulkul siosan manut wiguna.

## Pawos 38

Suaran Kulkul sane kerajegang mebina binayan artin ipun sekadi ring sor puniki :

1. Suara apisan tugak, artin ipun sinalih tunggil krama sampun embas mederbe oka;
2. Suara ping nem ngompang, artin ipun sinalih tunggil pianak utawi okan Krama Banjar ngerangkat;
3. Suara ping tiga tugak, artin ipun wenten sinalih Krama Banjar kelayu sekar utawi padem;
4. Suara kalih tulus banban, artin ipun Krama sane kedawuhin patut medal manut kabuatan;
5. Suara kalih tulus megat, artin ipun arahan pekaryane tan durus;
6. Suara bulus ngelantur, artin ipun nyihnayang baya puun utawi geni baya;
7. Suara bulus mewali-wali, artin ipun cihna baya wenten anak ngamuk;
8. Suara ngompang banban, artin ipun wenten bulan utawi surya kepangan;
9. Suara atulus banban, artin ipun baya sampun prasida katulungin, utawi sampun aman;
10. Suara ngompang banban ngelantur, pinaka tengeran pujawali ring Pura.

## Pawos 39

Kulkul Desa lan Banjar Adat tan wenang ketepak, yening tan sangkaning pituduh Prajuru, sejawaning tengeran Panca baya.

## Pawos 40

Sapa sira ugi nepak Kulkul tan sangkaning pituduh Prajuru, patut digelis sapekse maka buatan penepake. Sapa sira memurug patut keni sisip tur kedanda manut Perarem.

## Pawos 41

Sapa sira ugi nepak Kulkul tan manut wiguna patut keni sisip tur kedanda manut Perarem.

Palet 4  
PARUMAN

Pawos 42

Paruman luwir ipun : Paruman Krama Banjar, Paruman Krama Desa, Paruman Prajuru Banjar lan Paruman Prajuru Desa muah Paruman tiosan manut wiguna.

Pawos 43

Paruman Krama Desa nganutin kabuatan sekirang ipun awarsa apisan, Paruman Banjar nganutin kabuatan sekirang ipun nyabran asasih apisan, Paruman Prajuru nganutin kabuatan sekirang ipun nyabran asasih apisan.

Pawos 44

Paruman kelanturang risampun Krama rawuh lintang ring atenga.

Pawos 45

Paruman kaping siki lan kaping kalih, taler tan nganutin Pawos 44 ring ajeng, Paruman kaping tiga kelanturang, Krama Desa sane rawuh wenang ngewentenang Pamutus.

Pawos 46

Krama sane tan ngerawuhin Peparuman patut keni sisip tur kedanda manut Perarem.

Pawos 47

Krama sane tan ngerawuhin Peparuman tur sampun mesadok ring Prajuru, tan kesisipan.

Pawos 48

Pemutus Paruman kebawos pastika risampun kecumponin manut krama lan Perarem gilik saguluk utawi musyawarah mufakat.

Pawos 49

Pamutus taler keanggehang pastika risampun kecumponin lintang ring atenga sang rawuh.

Palet 5  
DRUWEN DESA

Pawos 50

Padruwen Desa Adat Kwanji luwire :

1. Pura Desa, Puseh, Dalem, sane ketah kebawos Pura Kahyangan Tiga, jangkep saha piranti, palemahan lan dagingnyane;
2. Setra jangkep saha Pura Mrajapati;
3. Bale Wantilan;
4. Tanah carik lan tegalan manut Ilikita;
5. Gong;
6. Druwe-druwe siosan manut Ilikita.

Pawos 51

Padruwen Desa sane munggah ring Pawos 50 ring ajeng dados pasikian ring Pura Kahyangan Tiga.

Pawos 52

Polih olihan druwen Desa kaenterang olih Prajuru Desa, sejeroning kebuatan manut Perarem.

Pawos 53

Sapa sira ugi tan kedadosang ngadol, nukar druwen Desa sejawaning ketepasan manut Perarem saha Ilikita sane pastika.

Pawos 54

Prajuru Desa patut nyabran asasih mesadok utawi nguningayang indik padruwen Desa ring Krama Desa.

Pawos 55

Sakaluwirin padruwen Desa patut wenten ilikitannyane.

Palet 6  
SUKERTA PAMITEGEP

Kaping 1  
P E K A R A N G A N

Pawos 56

Seluiring karang patut wenten margi.

Pawos 57

Karang paumahan, teba patut wenten wates, penyengker utawi pagehan.

Pawos 58

Prade kerasayang pagehan utawi penyengker inucap ngelikadin, yening pada arsa saking penyanding, kengin batese nganggen pinget kewannten.

Pawos 59

Karang paumahan patut maulu kaler lan kengin tur kasengker utawi kepagehin olih sane madruwe ulu.

Pawos 60

Wates utawi ulu manut pawos 59 sane nenten kasengker, kengin kasengker olih pengadinnyane, penyengker inucap kekuasa olih sane nyengker.

Pawos 61

Karang paumahan sane meajeng ke margi, patut kasengker olih sane nruwenang.

Pawos 62

Karang medruwe petelajakan sane patut kepelihara antuk sane maderbe karang.

## Pawos 63

Ritatkala ngaryanang panyengker pekarangan utawi wates sane ngelikadin patut kecumponin olih pengadinnyane.

## Pawos 64

Sapa sira ugi melaksana ring pewatesan lan penyengker sane ngawinang rusak lan mocolang anak siosan, patut kesisipan :

1. mecikang saha upakara manut sastra agama, sehananing sane karusak;
2. kedanda agung alit ipun manut Perarem.

## Pawos 65

Sinalih tunggil Krama Desa utawi Banjar tan kalugra ngentungan lulu, bebelahan miwah barang-barang bekas siosan ke karang anak siosan, ke jelinjing utawi tukad, ke margi utawi gebyog, ke karang Banjar utawi Desa miwah ke genah sane siosan sane nenten kepatutang anggen indik punika. Sapa sira tiwal ring indik puniki, patut mersihang tur kedanda manut Pararem, saha upakara manut sastra agama yening ngeletehin.

## Pawos 66

Sinalih tunggil Krama Desa utawi Banjar tan kalugra ngentungang wangke ke karang anak siosan, ke jelinjing utawi tukad, ke margi utawi gebyog, ke karang Banjar utawi Desa miwah ke genah siosan sane nenten kepatutang anggen indik punika. Sapa sira tiwal ring indik puniki patut nanem ring genah lan tata cara sane kepatutan tur kedanda manut Perarem, saha upakara manut sastra agama yening ngeletehin.

## Pawos 67

Krama Banjar utawi Desa nenten kedadosang nuba ring jelinjing utawi tukad, sawah, miwah pekarangan anak siosan. Sapa sira tiwal kesisipan :

1. negen prebiya kepocolan yening mocolan anak siosan;
2. kedanda manut perarem.

## Pawos 68

Krama Banjar utawi Desa nenten kedadosan nyemuh ring pagehan utawi tembok penyengker, bilih-bilih sane meajeng ke margi utawi gebyog lan genah suci, yening memurug patut keni sisip tur kedanda manut Perarem, saha upakara yening ngawinang leteh.

## Pawos 69

Ritatkala wenten wewangunan ring Desa, karang paumahan sane nenten utawi durung keumahan patut keni pemopog manut Perarem.

## Pawos 70

Krama Desa patut mederbe margi ritatkala muat sawa utawi mekutang sane mula dados utawi lumrah ke marginin muat sawa rauh ring setra.

## Pawos 71

Ngemargiang sawa ring tegalan wiadin sawah manut pewarah Prajuru Desa wiadin Prajuru Subak utawi Pekaseh, tegal utawi sawah kemargiang inucap, patut keupakara manut sastra agama, antuk sang sane mederbe sawa.

## Pawos 72

Jadma padem ring pekarangan anak siosan, tegal, sawah genah punika patut keupakara manut sastra agama antuk sang sane mederbe sawa.

## Kaping 2

## TETANDURAN LAN PEPAYONAN

## Pawos 73

Tetanduran lan pepayonan tan dados ngungkulin karang anak siosan.

## Pawos 74

Ngawit nanem taneman tuwuh ring karang paumahan utawi tegalan, sane nyanding karang paumahan sekiranyaane 2,50 m ring tegalan sekiranyaane 1,50 m, saking wates ke jero yening wenten sane mentik tur tan manut ring punika patut keebah utawi keabut.

## Pawos 75

Tetanduran lan pepayon sane ngeranayang bhaya anak siosan iwang patut genahnyane, ketetepang olih Prajuru Desa.

## Pawos 76

Pepayon sane patut keebah utawi keabut, ketotor ke laksanayang olih sane mederbe, mewaneng kalih wuku utawi empat belas rahing ngawit saking rahina penetapang tetepasan Prajuru Desa.

## Pawos 77

Pepayon sane manut ring pawos 76 ring ajeng, sane tan kelaksanayang olih sane mederbe, dados kelaksanayang olih sane kebayaning, saang tetotorannyane bukti antuk sane kebyanin.

## Pawos 78

Pepayon ebah utawi empak tur mocolang anak siosan, sang mederbe pepayon patut keni sisip antuk sang sane keni kesengkalan, merupa prabeya kepocolan saha upakara manut sastra agama, agung alit prabeya kepocolan manut paigum Prajuru Desa lan Banjar, sane keni kesangkalan lan sane medruwe pepayon.

## Pawos 79

Pepayon sane keebah, ketotor, kepunggul tur ngerubuhin wewangunan anak siosan, sane ngangken ngelaksanayang patut kesisipan lan negen prabeya mecikang kerubuhan, sane medulurin upakara manut sastra agama.

## Pawos 80

Sapa sira tiwal ring pawos 78 lan 79 ring ajeng, patut kedanda manut Pararem.

Kaping 3  
W E W A N G U N A N

## Pawos 81

Wewangunan tan kepatutan ngelintangin wates pekarangan, ngungkulin wewangunan anak tiosan.

## Pawos 82

Wewangunan sane kaanggen kandang wewalungan, kakus pesiraman, pewaregan, kotorannyane tan kepatutan ngelintangin wates pekarangan.

## Pawos 83

Wewangunan ring Pawos 82 ring ajeng, kotorannyane patut kewentenan wangunan bambang septiktank lan pengisipan tur kebersihan.

## Pawos 84

Sapa sira tiwal ring Pawos 82, 83 inucap patut kesisipan lan mecikan kerusakan saha upakara tur kedanda, manut Perarem.

## Pawos 85

Prade ngewangun ring tepisiringan wates, patut ngawentenang paigum sareng pengandinnyane tur mesadok ring Prajuru Banjar lan Desa saha ilikita pastika. Yan mamurug, riwekas prade kewarah antuk pengandinnyane patut kegubar antuk sang mederbe, tan polih prabeya ke pocolan.

Kaping 4  
W E W A L U N G A N

## Pawos 86

Sehananin wewalungan suku patpat tan kedadosan utawi kepatutan kelumbar, wewalungan suku kali kepiguman manut Perarem.

## Pawos 87

Wewalungan sane mayanin utawi ngerusak, sang maderbe patut keni sisip negen prabeya kepocolan saha upakara.

## Pawos 88

Wewalungan suku patpat sane melumbar, wenang ketaban lan utawi kesadokan ring prajuru, sane maderbe patut kedanda manut Perarem.

## Pawos 89

Wewalungan sane ketaban patut keserahan ring sang maderbe, risampun naur danda lan prabeya kepecolan, kepiguman olih Prajuru Desa, sang maderbe wewalungan, lan sang kepecolan, manut kepecolannyane.

## Pawos 90

Pikolih danda manut Pawos 88 lan 89 ring ajeng kebukti antuk sane naban utawi nyadokan, Prajuru lan Krama Banjar, sane kapiguman manut Perarem

## Pawos 91

Wewalungan sane tan wenten ngariangken jantos abulan pitung dina utawi petang dasa kali rahina, wewalungan inucap dados kekuasayang antuk sane polih naban.

## Pawos 92

Wewalungan ring ajeng inucap, padem sangkan tan kerencanayang sane naban patut mesadok ring Prajuru, sane naban luput saking pengentosannyane yening manut ring Tri Pramana.

## Pawos 93

Tan kelugra ngangon lan negulin wewalungan ring Pelemahan Pura, Mrajan, Setra, Pempatan, miwah genah suci sane siosan.  
Yening tiwal patut kesisipan tur kedanda manut Perarem saha upakara manut sastra agama yening ngeletehin.

## Pawos 94

Tan kelugra ngangon lan negulin wewalungan suku patpat ring pundukan sawah, karang utawi tegal anak siosan yening tiwal patut keni sisip manut Perarem.

Kaping 5  
B H A Y A

Pawos 95

Sane keanggehang bhaya wenten limang soroh kewastaning Panca Bhaya luwir ipun :

1. Jiwa bhaya, minakadi keleston amuk;
2. Artha bhaya, minakadi kebegal, kerampok, kemalingan;
3. Agni bhaya, minakadi umah puun;
4. Er bhaya, minakadi belabar utawi kebanjiran;
5. Duracara bhaya ring Desa Adat, Agama, minakadi mesanggama ngajak buron, ngerusak Parhyangan.

Pawos 96

Krama Desa sane uning kawentenang bhaya ring ajeng patut ngawentenang upaya ngandeg lan utawi agelis nyuarayang kulkul Banjar cihna bhaya tur kesadokang ring Prajuru.

Krama Banjar pengadinnyane patut gelis nyawurin suaran kulkul punika, nyantos kulkul Banjar sekuwub Desa Adat Kwanji mesuara nyawurin, saha Krama Desa, Krama Banjar patut gelis medal saha seregep gegawan ipun, mapitulung ring sang sane keni bhaya.

Pawos 97

Bhaya Duracara ring Agama kebiyaktayang mecihna Tri Pramana, saksi ilikita, bukti, sane melaksana patut kesisipan tur kedanda manut Perarem, saha upakara manut sastra agama, idusta keatur ring Guru Wisesa.

Pawos 98

Yan prade pacang meseserep utawi ngeledahin ritatkala kemalingan utawi artha bhaya, patut nunas pengeruak ring Prajuru manut dudonan.

Meseserep ring Banjar utawi ring Desa siosan, patut ketuntun olih Prajuru, tur polih pengeruak ring Prajuru utawi Kelihan Banjar inucap.

Pawos 99

Pratingkahe sane mapailon ring idusta patut kedanda manut Perarem.

Kaping 6  
PENYANGGRA

Pawos 100

Sinalih tunggil Krama Banjar ngewangun Karya Panca Yadnya luwir ipun Dewa Yadnya, Resi Yadnya, Manusa Yadnya, Bhuta Yadnya, dados nunas penyanggra ring Krama Banjar manut Perarem.

Pawos 101

Krama sane ngewangun Karya Yadnya sane nganca dewasa, patut mesadok ring Prajuru, sekirang-kirangnyane pitung rahina sedurung rahina Karya Yadnya. Karya sane padgatakala ketepasin manut Perarem.

Pawos 102

Ngaben Ngerit kelaksanayang sekirang kirang ipun nyabran 10 warsa. Pidabdab siosan ketepasan manut Perarem.

SARGA IV  
SUKERTA TATA AGAMA

Palet 1  
DEWA YADNYA

Pawos 103

Sane kasinanggeh Parhyangan lan Sungsonian Desa luwire :

1. Pura Desa, Puseh, Dalem, sane katah kabawos Pura Kahyangan Tiga;
2. Pajenengan sane meraga Duaja, sane ketah kebawos “Ratu Gede Kawitan”;
3. Pelinggih-pelinggih, genah lan wewangunan olih Desa manut dresta.

## Pawos 104

Parhyangan genah lan wewangunan suci, sane tan manut kadi Pawos 103 ring ajeng, sane wenten ring sawewengkon Desa Adat Kwanji, keayomin olih Desa Adat Kwanji.

## Pawos 105

Parhyangan genah lan wewangunan suci sane Pawos 103 ring ajeng, keaci keprebiyanin lan kapiara olih Krama Desa Adat Kwanji.

## Pawos 106

Pengaci ring pura-pura ring sawewengkon Desa Adat Kwanji nganutin kecaping sastra agama, saha kelaksanayang Nista, Madia, Utama, manut Desa, Kala, Patra lan Perarem.

## Pawos 107

Pura Ulun Desa kaelingan olih Krama Desa Adat Kwanji.

## Pawos 108

Ring soang-soang Pura patut keadegang Pemangku.

## Pawos 109

Ngadegang Pemangku manut dudonan :

1. ngewilangan tur nganggehan turun temurun;
2. nunas pewuwus;
3. sampun sinanggeh kapingit tur kapilih manut dresta;
4. kapilih utawi kasudi olih Krama Desa.

## Pawos 110

Sane tan wenang keadegang Pemangku luwire :

1. ceda angga, luwire peceng, perot, cungh, lan sepenunggilannyane;
2. kageringan, luwire sakit ila, ayan, buduh, lan sepenunggilannyane;
3. sane madruwe kesucian urip nenten becik;
4. sane siosan manut Perarem.

Pawos 111

Swadarmaning Pemangku luwire :

1. ngenterang upacara piodalan ring soang-soang pura;
2. setata ngemban keresikan lan kesucian pura;
3. setata nganutin sesana kepemangkuan.

Pawos 112

Petuas utawi pikolih Pemangku Khayangan Tiga ketepasan manut Perarem.

Pawos 113

Pemangku kagentosin sangkaning :

1. seda;
2. pinunas ngeraga;
3. nilar sesana, utawi melaksana dusta.

Pawos 114

Krama Desa kengin ngulemang Pemangku manut kawigunan lan Perarem.

Pawos 115

Sapasira ugi kasebelan utawi kecuntakan tan kepatutan ngeranjing ke Pura.

Pawos 116

Pawilangan kasebelan utawi kecuntakan luwire :

1. Cuntaka antuk ngerajasuala;
2. Cuntaka antuk ngembasang putra;

3. Cuntaka antuk keruron;
4. Cuntaka antuk sungkan sane ngewetuwang nanah wiadin getih;
5. Cuntaka antuk pawiwahan;
6. Cuntaka antuk anak istri mobot nenten keupakarayang;
7. Cuntaka antuk panak bebinjat sane durung keupakarayang;
8. Cuntaka antuk memitra ngalang;
9. Cuntaka antuk gamia gemana;
10. Cuntaka antuk salah timpal, menawi mesenggama sareng buron;
11. Cuntaka antuk kelayu sekar utawi padem.

Sesengker kacuntakan ring ajeng ketepasan antuk Perarem.

#### Pawos 117

Sane tan keneng cuntaka luwire :

1. Pemangku Khayangan Tiga;
2. Sang Sulinggih;
3. Rikala ngewangun yadnya sane kabawos galah dadi;
4. Alat-alat upakara sajabaning rumaketang sawa.

#### Pawos 118

Sajeroning penyengker pura kepatutang nganutin Tatwa Agama, Adat lan Dresta.

#### Pawos 119

Sane memurug Pawos 115 lan 118 ring ajeng, kasinanggeh sisip tur kedanda manut Perarem.

#### Palet 2

#### RESI YADNYA

#### Pawos 120

Sapa sire ugi pacang mepedgala wiadin medwijati patut mesadok ring Prajuru Desa lan Parisada Hindu Dharma manut dudonan.

Prajuru Desa patut ngawas, nitenin tur naweng ngalangin prade wenten kecihne sasar kekecap miwah dresta, tur sareng nyaksinin upakara saha nyiarin ring paruman Desa tegap rawuhing wates kewenangan pangenter yadnya.

## Pawos 121

Pemangku Kahyangan Tiga lanang istri, miwah pemangku sane siosan patut mediksa manut kecaping sastra agama.

## Pawos 122

Upakara Pitra Yadnya Pemangku Kahyangan Tiga kelaksanayang saha kaprebiyaning olih Krama Desa sane kelaksanayang Nista, Madia, Utama sane keputusang manut Perarem.

## Pawos 123

Sapa sira ugi sane sampun madwijati, ngawit jenek ring sawewengkon Desa Adat Kwanji, patut mesadok ring Prajuru Desa indik padwijatinnyane, saha ilikita sane pastika.

## Pawos 124

Prada sinalih tunggil Pemangku Kahyangan Tiga kapialangan, pengacine kengin kemargiang olih pemangku sane siosan utawi nuur Pandita manut pewarah Bendesa.

## Pawos 125

Ngadegang Pemangku Kahyangan Tiga Lanang wiadin istri, keprebiyaning olih Krama Desa.

Palet 3  
PITRA YADNYA

## Pawos 126

Genah mendem utawi ngeseng sawa emongan Desa Adat Kwanji sane meagama Hindu manut sahaning upacara-upakara kewastanin Setra.

## Pawos 127

Rahina Pemendeman utawi pangesengan sawa ring Setra, patut nunasang pemargi ring Bendesa Adat lan sang wikan.

## Pawos 128

Rahina Pemendeman utawi ngeseng sawa, sane tan onang ring Setra Desa Adat Kwanji, ketepasan manut Perarem.

## Pawos 129

Sahanan pidabdab ring setra, sane tan durus kemargiang patut keupakara olih sang sane ngangken ngelaksayanang manut sastra agama, Adat lan Dresta.

## Pawos 130

Sejeroning Desa rikala jaga mendem sawa lintangan ring adiri ring rahina tur setra tunggal, ketepasin manut Perarem.

## Pawos 131

Pawos 28 ring ajeng taler kemargiang rikala pelebon utawi ngaben.

## Pawos 132

Sajeroning Desa rikala mendem sawa miwah ngaben ring rahina lan setra tunggal, patut sane mependem kemargiang riyinan.

## Pawos 133

Layon sane mejalaran salah pati, ulah pati dados kebakte budal, tur kaupakara saha kependem utawi keaben sepatutipun.

## Pawos 134

Krama Desa sane padem patut keaben tur kelanturin upakara penyucian pitara minakadi nyekah utawi memukur lan selanturnyane, kelaksanayang olih sentanannyane manut pewilangan Nista, Madia, Utama kdasar in antuk Tatwa lan Sastra Agama.

## Pawos 135

Ngaben, Nyekah, lan selanturnyane sane kelaksanayang olih Krama Desa medasar antuk paigum sane ketah kewastanin “Pengeritan” kelaksanayang manut Perarem.

## Pawos 136

Sapa sira ugi sane pacang ngaben, patut mesadok ring Prajuru Banjar lan Bendesa Adat.

## Pawos 137

Sapa sira ugi sane tan kasinanggeh Krama Desa Adat Kwanji, sane meagama Hindu, pacang mendem utawi ngeseng ring Setra emongan Desa Adat Kwanji patut mesadok ring Bendesa Adat tur naur prabeya keletuhan saha upacara upakara manut sastra agama, Adat lan Dresta, agung alit prabeya keletuhan punika ketepasan manut Perarem.

## Pawos 138

Asing-asing Krama Desa tan Kapatutang mendem utawi ngeseng sawa wiadin ngeseng sawa pereresian ring sajeroning karang paumahan, tegalan, sawah sewewengkon Desa Adat Kwanji.

## Palet 4

## MANUSA YADNYA

## Pawos 139

Manusa yadnya inggih punika upacara-upakara darmaning manusa ngawit saking patemoning kama petak kelawan kama bang sajeroning garba ngantos kelayu sekar.

Upacara-upakara inucap madudonan sekadi ring sor :

1. Magedong – gedongan;
2. Embas rare;
3. Kepus udel;
4. Roras rahina;
5. Tutug kambuhan;
6. Nigang sasihan utawi metelubulanan;
7. Pawetonan utawi aoton enem bulanan;
8. Ngempugan utawi tumbuh untu;
9. Makupak utawi meketus;
10. Menggah Daha Teruna utawi merajasuwala, rajasinga;
11. Metatah utawi mepandes;
12. Mawiwaha.

Upacara-upakara inucap, Nista, Madia, Utama manut sastra agama lan dresta.

Palet 5  
BHUTA YADNYA

Pawos 140

Bhuta Yadnya inggih punika upacara upakara pabiyakala ring Pertiwi lan Kahyangan, sarwa prani saha upacara upakara ring bebhutan.

Pawos 141

Upacara pabiyakala ring sarwa prani luwire :

1. Ring sarwa tumuwuh rikala Tumpek Pengatag (Saniscara Kliwon Wariga);
2. Ring Sarwa ingon-ingon rikala Tumpek Kandang (Saniscara Kliwon Uye);
3. Upacara pekala-kalaan manusa manut wiguna kebawos Pabiyakala.

Pawos 142

Upacara pabiyakala ring Pertiwi, Kahyangan lan Bebhutan kewastanin Mecaru.

Pawos 143

Pecaruan manut Pawos 142 ring ajeng, Nista, Madia, Utama manut wiguna kelaksanayang manut sastra agama, Adat lan Dresta.

S A R G A V  
SUKERTA TATA PAWONGAN

Palet 1  
P A W I W A H A N

Pawos 144

Pawiwahan kelaksanayang mantuka patemon Daha Teruna sane sampun manut yusan ipun melarapan antuk lulut asih gumanti pacang makurenan manut Agama Hindu kedulurin upasaksi sekala niskala.

Pawos 145

Prade nabdab pawiwahan ritatkala sane Predana mawit saking sios agama, Pradana inucap patut kawisuda manut Agama Hindu sedurung upakara pawiwahan kemargiang.

Pawos 146

Pawiwahan kelaksanayang mejalaran antuk :

1. Memadik utawi kepekardiang olih asing-asing kulawarga antuk lulut asih sane kelaksanayang manut Adat lan Dresta;
2. Ngerorod utawi merangkat riyin sane medasar antuk tresna asih lanang istri sareng kalih kelanturang pekurenan manut Adat lan Dresta.

Pawos 147

Asing-asing Pawiwahan sane sampun pastika, patut kesadokang ring Guru Wisesa manut dudonan nganutin purusa.

Palet 2

## PEGAT MERABIAN

Pawos 148

Pegat merabian sinalih tunggil padem kalih nyapian.

Pawos 149

Pegat merabian lanang istri pasah tan sida kumpul malih patut mesadok ring Bendesa, tetepasan sane sinanggeh pastika risampun polih ilikita saking Guru Wisesa utawi Pengadilan.

Pawos 150

Nyapian utawi Pegat Merabian sane sampun polih tetepasan manut Pawos 149 ring ajeng patut ngaturang upakara Dewa Saksi ring Bale Agung kesaksinin antuk Bendesa.

Pawos 151

Sinalih tunggil tan ngrawuhin tatkala ngelaksanayang Padewa saksi upakarane kemargiang.

Pawos 152

Prade riwekas sang Pegat Merabian adung tur merabian malih patut ngelaksanayang upakara pawiwahan malih.

Palet 3  
INDIK SENTANA

Pawos 153

Sane sinanggeh sentana inggih punika Preti Sentana miwah Sentana Peperasan.

Pawos 154

Preti Sentana inggih punika Sentana sane metu saking Pawiwahan sane kepatutan.

Pawos 155

Prade pawiwahan nenten ngewentenan Preti Sentana, kengin ngidih sentana medulurin antuk upasaksi sekala niskala sane kewastanin Sentana Peperasan.

Pawos 156

Sentana Rajeg inggih punika Sentana Wadon sane kemanggehang Lanang tur ngelaksanayang Pawiwahan Keceburin.

Pawos 157

Sapa sira ugi sane kemanggehang Sentana Rajeg patut mapaiguman ring kulawarga pinih tampek tur mesadok ring Prajuru Banjar lan Desa. Risampun pastika patut kesiarin ring Krama Desa.

Pawos 158

Sane dados angkat keanggehang sentana, jadma lanang utawi istri, durung mapikuren, meagama Hindu saha tuwuh utawi yusan ipun alitan ring sane ngangkat, sejabaning wenten paigum ring kulawarga pinih tampek saha ilikita sane pastika.

Pawos 159

Pinih riya pengambilane patut saking purusa, yan tan wenten saking purusa wawu saking pradana, yaning tan wenten sinalih tunggil, wawu ngambil ring sapa sira ugi, sane kedasarin antuk paigum kulawargane sane pinih tampek.

Pawos 160

Sentana sane manggeh pastika manut adat sesampune mejalaran upakara kesaksinin antuk Prajuru Adat kalih kasiarang ring Krama.

## Pawos 161

Balu nyeburin yening ipun mapikuren malih kasinanggeh kelesa, sejabaning wenten paigum saha ilikita sane pastika.

## Pawos 162

Daha Teruna sane sampun meyusa langkungan ring 40 warsa, nenten wenten sane ngerobin, kengin ngangkat sentana.

Palet 4  
INDIK WARIS

## Pawos 163

Sane sinanggeh Waris inggih punika artha berana lan tetegenan.

## Pawos 164

Sane sinanggeh Ahli Waris, Preti Sentana purusa, Sentana Rajeg lan Sentana Peperasan sane pastika.

## Pawos 165

Prade nenten wenten sekadi Pawos 164 ring ajeng patut nureksa sila-sila utawi nyulurin pakeluwargan manut purusa, pernah ngunggahan miwah kesamping manut dudonan.

## Pawos 166

Waris kengin keterima antuk Ahli Waris risampun sane ngewarisang keaben.

## Pawos 167

Karang waris tan dados keadol, kegadiang, ketukar, yan tan polih penyungkem kulawargannyane saha ketumusang ring Bendesa Adat.

## Pawos 168

Balu sane tan mederbe pianak, makta artha berana saking tetatadan, artha berana punika tan kesinanggehan warisan.

## Pawos 169

Balu saking pradana, mulih Daha utawi Teruna sangkaning kelesa, nenten kesinanggeh ahli waris, sejabaning wenten paigum saking kulawargannyane saha ilikita sane pastika, yening nganutin swadarma kengin muponing.

Pawos 170

Prade wenten karang sane keputungan, Prajuru patut nureksa tur nibakang manut dudonan.

Prade nenten wenten, kengin ketibakang ke Desa Adat Kwanji tur ketumusang ring Guru Wisesa.

## S A R G A V I WICARA LAN PAMIDANDA

Palet 1  
W I C A R A

Pawos 171

Saluwiring Wicara patut kebawosang tur kapuputang olih Prajuru Desa.

Pawos 172

Sane wenang maosin mekadi muputang wicara ring Desa luwire :

1. Prajuru Banjar Suka Duka;
2. Prajuru Desa Adat.

Pawos 173

Wicara sane tan meresidayang puput ring Banjar, patut kelanturang ring Prajuru Desa Adat.

Pawos 174

Tetepasan I Prajuru mangda ngnutin Awig-Awig lan Perarem,

Pawos 175

Tetepasan mangda pastika, ngantenang iwang patut, melarapan Tri Pramana inggih punika saksi, ilikita, bukti saha tan maren nepek ring Catur Dresta.

Pawos 176

Wicara sane kesadokang yening durung polih tetepasan sejeroning awuku, patut wenten pengetut, sesampune tigang rahina saking pengetut punika nenten taler ketepasin, wenang kelanturang ring Guru Wisesa manut dudonan.

Palet 2  
PAMIDANDA

Pawos 177

Desa wiadin Banjar wenang nibakang pamidanda ring warga sane sisip sesampune wenten pemutus saking Prajuru Banjar Suka Duka utawi Bendesa Adat manut Awig-Awig lan Perarem.

Bacakan Pamidanda luwire :

1. Pengampura wiadin Pasuakan;
2. Upakara penyangaskara;
3. Denda artha;
4. Kesepekang wiadin kanoroyang mekrama.

Pawos 178

Saluwiring Wicara sane sampun janten kasinanggeh sisip manut Awig-Awig lan Perarem, sang sane keni sisip patut ngelaksanayang utawi nawur buntas sejeroning pewanengan ipun minakadi pamidanda, hutang peturunan, manut sekadi sane sampun keraremin.

Pawos 179

Saluwiring danda, hutang peturunan sane tan buntas kelaksanayang utawi ketawur sejeroning pewanengan ipun, Prajuru patut mapekeling ring sang sane sisip.

Pawos 180

Pakeling Prajuru manut Pawos 179 prade taler tan kelaksanayang, artha berana paderben sang sane sisip dados kerampag.

Luwir ipun ingon-ingon suku kalih, suku patpat, entik-entikan, pepayonan, sawah, tegalan, sejabaning prabot paon, sane keanggen ngerereh pengupa jiwa, sapunika taler sane keinggilang manut Agama Hindu, tan wenang kerampag.

Pawos 181

Pengerampagan kelaksanayang mewaneng pitung rahina ngawit saking Prajuru mesadok ring sang sane keni kerampag punika.

## Pawos 182

Pengerampagan tan dados kelaksanayang, sejeroning senger pewanengan sang sane keni kerampag nawur buntas kesisipan ipun.

## Pawos 183

Pengerampagan kemargiang olih Prajuru kesarengin antuk Krama Banjar, ngerawuhin umah sang sane keni kerampag tur ngambil artha berana sane keserahang sane keanggen muntasin kesisipan ipun, minakadi hutang peturunan muang danda.

Pikolih kerampagan sane lintang ring gebogan hutang muang danda inucap patut kewaliang ring sang keni kerampag.

## SARGA V I I

## NGUWAH NGUWUHIN AWIG-AWIG

## Pawos 184

Awig-Awig Desa Adat Kwanji dados kewahwuhin risampun polih pemutus ring Perarem sane kelaksanayang ring Paruman Desa Adat Kwanji.

## Pawos 185

Tetepasan nguwah nguwuhin Awig-Awig manut Pawos 184 ring ajeng, patut wenten ilikita saha lingga tangan tur kapidartayang ring Krama Desa Adat olih Bendesa Adat Kwanji.

## Pawos 186

Sakaluwiring sane manut wiguna, sane durung kebawos sejeroning Awig-Awig Desa Adat Kwanji puniki, taler kemargiang nganutin sastra Agama, Adat lan Dresta sane kadulurin antuk Perarem.

SARGA VIII  
PEMUPUT

Pawos 187

Awig-Awig puniki kawastanin Awig-Awig Desa Adat Kwanji.

Pawos 188

Awig-Awig puniki kamargiang ngawit keraremin.

Pawos 189

Awig-Awig puniki kararemin duk rahina Soma Paing Wuku Warigadian nemoning Purnama Jiyestha, tanggal 29 April 1991.

Pawos 190

Awig-awig puniki kelinggatanganin olih Bendesa Adat kasarengin olih Kelihan-Kelihan Banjar Suka Duka saha kesaksinin olih Kepala Lingkungan, Lurah lan Camat kapikukuhin olih Bapak Bupati.

Kwanji, 29 April 1991

Kelihan Banjar Kwanji Kaja,

Bendesa Adat Kwanji,

I WAYAN KARTA

I WAYAN LENDERA

Kelihan Banjar Kwanji Kelod,

Kelihan Banjar Umegunung,

I MADE SUDANA

I WAYAN TULUS

Kepala Lingkungan Kwanji,

Kepala Lingkungan Umegunung,

I MADE WETRI

I WAYAN MURNA

KEPALA KELURAHAN SEMPIDI,

KEPALA KECAMATAN MENGWI,

I PUTU EKA MERTHAWAN  
NIP. 010190630

Drs. I. B. MANU MANUABA  
NIP. 600006119

BUPATI KEPALA DAERAH TINGKAT II BADUNG,

I G. B. ALIT PUTRA

*(Disalin sesuai dengan naskah Awig-Awig Desa Adat Kwanji Tahun 1991)*